

## 3 Jon

### Te launiu hakatoru Jon e taataa

**Na hakataakoto hakamattua i roto te launiu nei:**

Na tattara kaamata *1.1—1.4*

Jon e hakammaha Gaius *1.5—1.8*

Diotrefes lauaa ma Demitrius *1.9—1.12*

Na tattara hakaoti *1.13—1.15*

<sup>1</sup> Anau he tama hakamaatua i te lotu, tena anau e taataa atu i akoe Gaius taku taina.

<sup>2</sup> Gaius taku taina roo hokotahi, anau e lotu ake ma akoe ki noho tauareka i na mee roo hakaatoa, tena akoe hoki ki se laavea na maahana, e mee anau e iroa ma te anana akoe raa e mataora roo.

<sup>3</sup> Anau e hihia roo te saaita alaa hakattina ana taatou nittae mai no tattara mai anau i te hakattina akoe e isi no tautari te hakamaoni raa, e ssau pera ma akoe na vahao hakaatoa e tautari te hakamaoni raa.

<sup>4</sup> Anau e hihia roo te saaita anau nirono ma na tamalliki anau raa e tauttari te hakamaoni raa, tena se hai mee hoki peeraa e lavaa te mee anau ki hihia.

#### *Jon e hakammaha Gaius*

<sup>5</sup> Taku taina, akoe eppena hakamaoni roo te hehekau akoe ma na hakattina ana taatou raa, niaina roo ma na tama raa ni tama akoe se iroa.

<sup>6</sup> Na tama raa e oo mai no tattara mai telaoui akoe raa i roto te hare lotu nei. Tena akoe ki kkira no mmata hakaraoui na tama raa i na tiputipu TeA-tua e hihai raa te saaita na tama raa e vakkai.

<sup>7</sup> Maitaname na tama raa e oo koi ma ki hehekau ma Krai, tena na tama raa se hihhai hoki ma na tama e nnoho pouri raa ki tokonaki laatou.

<sup>8</sup> Tena taatou na tama te lotu raa ki tokonaki na tama raa ki lavaa taatou te hehekau hakapaa ma na tama raa ki ppena na uata hakamaoni TeAtua raa.

### *Diotrefes laaua ma Demitrius*

<sup>9</sup> Telauniu anau nitaataa no kkave i te hare lotu raa se roroa hoki, e meia Diotrefes, tetama e hihai ma ki hakamaatua raa se hihai ki hakarono na tattara anau ni taataa ake raa.

<sup>10</sup> Te saaita anau e hamai raa avare, anau e me ki tattara ake aia ki iroa i na mee hakaatoa e ssara aia ni ppena raa, tena ma na tattara sakkino aia e tattara i te vahi taatou ia ma na tattara malliu aia e haere tattara raa.

<sup>11</sup> Taku soa roo hokotahi, auu setautari na tiputipu sakkino raa, e meia tautari na tiputipu e taualleka. Na tama e ppena na tiputipu taualleka raa ni tamalliki TeAtua, tena na tama e ppena na tiputipu sakkino raa sei ma ni tamalliki TeAtua.

<sup>12</sup> Na tama hakaatoa e tattara hakamamaha roo ia Demitrius, tena na tiputipu aia raa e huri mai ma e hakamaoni. Maatou hoki e tattara hakamamaha roo itama raa, tena akoe e iroa ma na tattara maatou nei e hakamaoni.

### *Na tattara hihhia hakaoti*

<sup>13</sup> Anau e tamaki roo na mee ma ki tattara atu i akoe, e meia anau se hihai ki taataa atu na tattara raa i roto te launiu.

<sup>14</sup> Anau se roroa ku haere atu no mmata akoe, tena anau hokonnau e me ki tattara ma akoe.

15 Anau e lotu ake TeAtua ki hakatapu akoe ma te noho laoi!

Na soa laoi akoe i te kina nei raa e kou atu na tattara hihhia laatou. Akoe ki haere lulluu na tama hakaatoa ma maatou.

**Nukumanu**  
**The New Testament in the Nukumanu language of**  
**Papua New Guinea**  
**Nupela Testamen long tokples Nukumanu long**  
**Niugini**

copyright © 2020 Wycliffe Bible Translators, Inc.

Language: Nukumanu

Contributor: Wycliffe Bible Translators, Inc.

All rights reserved.

2023-03-22

---

PDF generated using Haiola and XeLaTeX on 18 Apr 2025 from source  
files dated 22 Mar 2023

54439682-f8e2-586d-98e1-295d02f74287